

COVID-19: Pekerja di zon merah digalakkan jalani swab test, elak wujud kluster baharu – Menteri

Astro Awani

21 Oktober 2020

Umavathi Ramayah

KUALA LUMPUR : Pekerja yang bekerja di zon merah digalakkan untuk menjalani ujian calitan atau swab test COVID-19.

Menteri Kanan Pertahanan, Datuk Seri Ismail Sabri Yaakob berkata, ia adalah untuk memastikan pengesanan awal jangkitan itu bagi mengelakkan wujudnya kluster baharu di tempat kerja.

"Bagi pekerja yang berada di zon merah, kita tahu kalau mereka bekerja di zon merah risikonya tinggi, ataupun jika mereka yang tinggal di zon merah bekerja di zon kuning, risikonya tinggi kepada pekerja di zon kuning.

"Jadi kita telah bersetuju walaupun tidak diwajibkan untuk mereka membuat swab test tapi kita amat menyarankan untuk melakukan ujian tersebut," katanya pada sidang media di sini yang disiarkan secara langsung menerusi Facebook, pada Rabu.

Mengulas lanjut, Ismail Sabri memberitahu, ia adalah bagi memastikan status diri supaya tidak merbahaya kepada pihak lain.

Bagaimanapun, menurut beliau, bagi pekerja-pekerja warga asing yang bekerja di sektor pembinaan dan pengawal keselamatan, mereka diwajibkan untuk menjalani swab test.

"Mereka yang mempunyai gejala juga sudah tentu diwajibkan melakukan swab test," tegasnya.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/covid19-pekerja-di-zon-merah-digalakkan-jalani-swab-test-elak-wujud-kluster-baharu-menteri-264632>